



وحياتنا

فهي الميسرة



فَمِنْكُمْ
فَهَذَا الْمَسْأَلَةُ

فهرسة مكتبة فهد الوطنية أثناء النشر

ديوي: 811.095531 1430/1964

رقم الإيداع: 1964/1430

الكتاب: وشم

المؤلف: فهد المساعد

التصنيف: شعر

الطبعة الأولى: ديسمبر (كانون الأول) 2009

الطبعة الثانية: مارس (آذار) 2021

الرقم الدولي المتسلسل للكتاب: 0 - 2212 - 00 - 603 - 978 ISBN:

تصميم الغلاف:



جميع حقوق الطبع وإعادة الطبع والنشر والتوزيع محفوظة لمدارك. لا يسمح بإعادة إصدار هذا الكتاب أو أي جزء منه أو تخزينه في نطاق استعادة المعلومات أو نقله بأي شكل من الأشكال دون إذن خطي من مدارك.

Madarek مدارك
Madarek Publishing House دار مدارك للنشر

8470 طريق عثمان بن عفان، حي التعاون، الرياض، المملكة العربية السعودية
8470 Othman Bin Affan St, Al Taawun Dist, Riyadh, Saudi Arabia
Zip Code: 3844 - 12478 Riyadh, Saudi Arabia Tel: +966 114541148

mdrek.com

read@mdrek.com

DarMadarek

فَهِيَ الْمَسْأَلَةُ

وَالْمَسْأَلَةُ

أرجو أن يبقى ولو واحداً من هذه الأبيات
(وشماً) في روح من يقرأها

فَهَذَا الْمَسِيحُ

يمكن أنا أكون أعز إنسان في عيونك..
بس انت والله .. كل الناس في عيوني ..!
كل يوم اجلس على جال البحر وأقول: توي
لا سألني: ما فقدت الحلم في لمسة يدينه؟!
مادريت إن البحر ما قال لأواجه: تروي
ومادريت ان الغرق هو حجة غياب السفينة
ما عرفت أرضيك يا عذب اللمي
يوم تمدحني ويوم تسبني!
أنت .. يا اما حبني حب عمى
ولا ريحني بلاش تحبني...!!
يا أرق من شعر وأعذب من حكي طفلة
يا أغلى من أحب وأغرب من يجافيني
جيتي مثل بيت شعر .. جاء على غفلة
ورحتي مثل دمعّة .. ما شاورت عيني
هذي بلادك / بس تكفى لا تخليها
يا من سكنت أقصى ضلوعي لا تخليني
الناس كلٍ له بلاد و عايش فيها
وأنا الوحيد اللي بلادي عايشه فيني
أفتح ضلوعك وأجمع الخير و الحب

اليوم جمعه و الله الله في الأسباب!
سامح .. ترى من سامح وقال : يارب
يفتح له الله في سما رحمته باب
الأرض رحبه / علامك جالس لحالك
إن كنت مهموم .. كلٍ عنده همومه ..
في داخلك (طفل) .. لا تقتله باهمالك !
وقّف زمانك .. وصح الطفل من نومه..
صباح العطر والورد الندي والحب والأشواق
صباح عيونك اللي ما صحت من نومة البارح
عسى يومك سحابة خير / لا راعد ولا براق
تباشير الفرح فيها تهديّ بالك السارح
كنا نقضيّ ليلنا بالسواليف
وصرنا نراسل بعضنا مثل الأغراب
فقدت في الشدة حبايب وخالن
هانت عليهم عشرتي بس ماهنت
خانوا وقلت إن الزمن مثلهم خان
لكن بعد ماشفت زورك تطمنت
عرفت من فقدي لهم إني إنسان
ما عاد باقي له من العالم إلا انت
ايه قلبك رغم جرحه وانزعاجه

الزمن ماغيّر احساسه تجاهي
يكفي إنك يا ضوى القلب وسراج
كل حاجه فيك ظلت مثل ماهي
النجل في وجهك أول ما انتواجه
والبراءة في عيونك وأنت لاهي
وبسمتك لامن بغيت تقول حاجه
ونظرتك لامن لمحتك وأنت ساهي
الباب هذا باب بيتك .. بس ما يفتح عليه!
الباب هذا لو فتحتة .. تنفتح لي الحياه
وأنا وراه .. احسّ كنّ الدمع تخنقني يديه
احسّ كنه حدّ منفي .. و الوطن كلّ وراه

قلت لك الله يهديك
قبل اتعلق فيك
إن كان قلبك ما يبييني
قد ما قلبي يبييك
لا تعودني عليك
استغفر الله كثر ما أذنبت وأخطيت
وأستغفر الله كثر ما ضاق صدري
واستغفر الله كل ما أصبحت وأمست
عن ذنب أدري عنه أو عنه مدري
يا أم القوام اللي من أدناه هبّه
يميل كن الخيزران آدميّه
وأم الجدیل اللي من يخاف ربّه
يذكر عليه الله ويذكر نبيّه
إن كنت مخطي فالخطا ما يحبّه
إلا العذر وأنا اعترف بالخطيّه
وهذي بعد من فوق الأعذار حبّه
لا تزعلين الله يخليك ليّه
يا أعز من دمعي لعيني
وألذ وأحلى من السكر

يا خطوط الأيام ف يديني
ياطفلة اللي نست تكبر
أنا أدري أنك تحبيني
وأنا أحبك بعد أكثر
يسعد صباح العيون اللي صحت بدري
إصحى حرام الصباح يمر من دونك
جتك الرسالة على غفله وأنا مدري
حتى الرسايل تبي تصبح على عيونك
يا هلابك يابعد كل الأماكن
شبه كامل واتصالك كملك
الرسايل كم على اسمك تباكن
إنت تدري حتى لو ماقلت لك
الغلالك في حنايا القلب ماكن
توجك قلبي على ضلوعي ملك
مو أنا الي بس لك مشتاق .. لكن
الأماكن كلها مشتاقه لك
تدرين لامنك زعلتي وش يصير ؟
تدرين لامن صار خاطرك مكسور
تكدّس أغصان الشجر بالعصافير
وكل ماذرفتي دمعه .. يموت عصفور

لا تحطم لو تحطم لك أمل
اعرف إن الله يحبك وابتسم
لا تقول الحظ عمره ما كامل
قل : أنا حاولت والله ما قسم
اي والله إن شوفته تساهل عنادي
اللي عشانه تركت الدار والتربه
ما أقول لك شوفته نستني بلادي
لكنها يا ولد ، نستني الغربه
صوتك وحشني يا وطن .. وأحترت وين ألقاه فيه؟
وأمسيت اغني به .. وأنا اللي كنت اغني له معاه
وحشني صوتك يا وطن و أمسيت اغني : ليه؟ .. ليه؟
ليه الكلام اللي نقول يموت في سكة صداه؟!
اقسم بربي ورب العالم وربك
يا أول أنسان أحبه قبل ما اشوفه
لو حبني شخص واحد ربع ما أحبك
لا حط كل البشر في راحة كفوفه
في سجدتك يامن تبهدلت وياك
ادعي لي إن الله يعدل سواياي
اللي تعدى عمر ما أظن يخفأك
ادعي لي بس ألحق على عمري الجاي

اشتقت اوقف هنا وأعدد أحبابي
وأقول للي أحبه إني أحبه
يا اخوان شعري ياربعي يا أول اصحابي
ماكان لي في الغياب المراد ذا سبه
يارب إذا لي دعوة مستجابة
بوجز لو إن اللي أنا ابيه واجد
ابقى على نهج النبي و الصحابه
واموت بين يديك يارب ساجد
خذني فحضنك أبغى .. ياه مبطي ما غفيت
وإن لمحت دموع عيني .. سو نفسك ما لمحت
يسعد صباحك ويسعد نظرة عيونك
ياكبر حظ الرسالة يومها قبالك
تبغى تعرف إني أكثر من يحبونك
تشهد لي أول رسالة وسط جوالك
استجبنا للفراق ولا تناسينا الموده
ليلة الفرقا تبادلنا الرسايل والهدايا
قال والله لاحتفظ في صورتك تحت المخده
قلت والله لاحتفظ في صورتك بين الحنايا
وحيد لا صاحب ولا خل وعيوني سارحه
استرجع اللي فات من عمري وأقول العمر فات

ماقد شعرت بطعم هذا الحزن كثر البارحة
ساعة عرفت إن أجمل الأشياء صارت ذكريات
اما أنت يا قلب لو صالوا بك وجالوا
خلك مثل ما انت لا تشره على أيديهم
الناس من خلقت الدنيا ومازالوا
عيال رجّال لكن فيهم و فيهم
وذولك من عرض ناسٍ مالي إن مالوا
إلا إني اسكت واقول : الله يجازيهم
كم ترجيتك وحاولت وطلبتك
وقلت تكفى لاتعودني عليك
شوفني هالحين ذنبي في رقبتك
كل شي فيّ صار يموت فيك
استغل اليوم في حاجة تفيدك
دام هذا اليوم عيد المسلمين
زر مريض /اكفل يتيم اجعل رصيدك
يتضاعف عند رب العالمين
في عز ماكنت أهوجس فيك وأفتح لك
أبواب قلبي خذتني رجلي لبابك
جيتك وأنا ما اذكر إني كنت رايح لك
بس اذكر إني كذا لا طول غيابك

صباحك نور

صباحك مدرسه ونعاس طفلٍ ف آخر الطابور

صباحك أم تخوّف ولدها بطاري الدكتور

صباحك لمةً أصحابٍ نسوا ب أن الزمان يدور

صباحك ضحكة بنّيه تقول لصاحبها أسرار

صباحك هدهدة أشعار

وعاشق يهمس لخله : أنا ما أشك بس اغار

صباحك طفلتين صغار

جمعهم صف وأفترقوا

وتلاقوا يوم صاروا كبار

استغرب إني ما كرهتك لهاالحين

واستغرب إني ما قطعت الرجا فيك

قد شفت لك قلبٍ مثل هالمسيكين

خليته لحاله وعيا يخليك

كني أنا واياك عينين في راس

ياما تسامرنا وياما غفينا

لكن على قرب المشاعر والاحساس

بنموت وحننا مع بعض ما التقينا

ثمان أيام عدت في غيابك عن ثمان سنين

تخيل عاد لو صارت على قولك ثمان شهور ؟
كل شي في حياتي له ضريبه
وكل حاجة لازم تكون بمقابل
وإنتي والله لو تكوني لي حبيبته
والثمن في نصف هذا العمر .. قابل
شي واحد قبل ما أبدأ ما أبي أي شي ثاني
يخطر ف بالك وأنا اكشف لك شعورٍ تجهلينه
إن أنا وبكل ما تحمله «أحبك» من معاني
كنت، وراح أبقى أحبك لين مدري ش هو لينه
روحي فداك وفداك الأمة اجمعها
الله يكرم ملامح وجهك الباسم
من دون عرضك جيوش الغرب نردعها
إلا الرسول الأمين إلا ابا القاسم
يا طير شف درفة الشباك مفتوحه
تركته لك مثل ما كنت خابرها
لا من خذلك الزمان وكثرت جروحه
لا تسأل أول جروحه وش هو آخرها
تعال شف صاحبك قافل على روحه
بيبان الايام .. والدنيا مسكرها
غايب عمر واليوم راجع لي تقول اشتقت لك

والله وفيك الخير بس الشوق وينه وأنت وبين
يومك تقول اشتقت لك ككك تقول أبقتك
لك عين ترجع بعد هذا العمر .. أصلاً إنت مين؟!
ما أحبك فوق الأرض وبس ياكل الخلايق
حتى تحت الأرض أحبك يا بعد من داسها
من كثر ما أحب وأكره عنك واصونك
أصبحت دفتري مشاعر ، وإنت مضموني
إن غبت عني شعرت بلذة طعونك
وإن شفت زورك شعرت بقيمة عيوني
كل ما تطري علي فكرة هواك الأولاني
اشعر إنني انطعن مليون مره من يدينه
اشعر إن عيونك الله ما خلقها إلا عشاني
كيف كانت تبتسم له قولي إنك تخدعيه
إنت لا من غبت حتى مرايتك صارت حزينه
كيف ما تبغاني أحزن وإنت لي حظ ونصيب
من علم الحزن بيعث في ملامحنا
من علم الموج يرحل عن موانينا
لو صار منّا خطايا وقت سامحنا
حرام هاللي تسوي يا زمن فينا
لو ما به إلا الأرض من تحت أقدامك

لأبوس أثرك اللي على الأرض واكنه
وشلون أجل ما أبوس الأرض قدامك
وإنت تحت أقدامك الخير و الجنة
يا صاحبي لا تجي وتقول لي قالوا
لو قلت ما قلت غير الله يجازيهم
لا شفت بعض الأوادم للردى مالوا
نفضتهم من عيوني قبل أخليهم
كل ما جبت كبوه قلت كبوة جواد
وطال كبو الجواد وطال معه العدي
صباح الخير والبال الطويل الهادي الرايق
صباح الشارع اللي تزهر وروده على شانك
من لسانك صباح النور تشرح خاطر الضايق
وش أحلى من صباح النور لا صارت من لسانك
بصوته ، شقاوته ، مزحه ، طبعه الهادي
يملا علي الفضا .. من شرقه لغربه
اذكريني لا انتهت للشمس رحله مع نهار
واذكريني لا صحى للصبح ورد الياسمين
واذكريني لا لمحتي في ليالي البرد نار
واذكريني لاسمعتي للمطر صوت حزين
لا الوقت وقتك ولا لك شي في بالي

أنا نسيتهك مثل ما كنت ناسيني
ياما تمنيت نظرة منك في حالي
ياما تمنيت صوتك لو يناديني
وأقول لا اظلم علي الليل بلحالي
الله يجيبه يشئت غربة سنيني
الدمع ما هو عيب رح علم اللي
يقول عمره ما بكى في حياته
الدمع ما يقطع صلاة المصلي
والضحك مثل ابليس يقطع صلاته
في الذاكرة ريحة زهور ميتة
وأشياء كثيرة صارت مدري وبينها
طفلٍ يشيل العيد في طاقيته
وأُمٍ تخش الدمع عن طفليها
ورفيق عمر الوقت شح بجيبته
وبنت قسمت القلب بيني وبينها
كل الصباحات ما تكمل بلا شوفك
اصحى واخل الصباح بشوفتك يكمل
صباح قلبك ، شعورك ، ضحكك ، خوفك
صباح لمسة يديك ، ووجهك الأجل
جاء يشوف الحال كيفه بعد ما هزه حينه

وقبل يسألني سألته كيف حالك يا الحبيب
قال: أنا كني غريب ضيع دروب المدينه
قلت: أنا كني مدينه تنتظر رجعة غريب
اعتبرني في بداية سكتك عابر سبيل
ورح وأنا قلبي معك من وين وجهت الشراع
يكفي إني لا انذكرت بسالفة عشاق قيل
عاشر أحبابه شجاع .. وفارق أحبابه شجاع
صوت حبيبي وقبل أقول يا عونك
شكى جروحه ورحت أشكي له طعوني
يقول مقدر أعيش اليوم من دونك
وأقول حتى ولو ما عشت من دوني
يمكن أنا أكون أعز إنسان فعيونك
بس إنت والله كل الناس فعيني
دورت بعدك حبيب وقلت في بالي
أحب همي ؟ وقال القلب روقنا
قلت: إنت وش دخلك بحب غربالي
أقل حاجة نموت وما تفارقنا
شكواي للي عليه الضيق وافراجه
اللي إذا شاء يرحمني ويرزقني
حبي لها لو أدري إن فيه مخلوق

قد حب مثله قلت: « يا للغرابة»
هالآدمي من وين له قلب وعروق!
والصبر هالمسكين من وين جابه؟
اليوم ما يبدأ بعد طلعة الشمس
يبدأ معك وإذا انتهى ينتهي فيك
ياللي وري جفونك بدا وانتهى أمس
اصحى ، بنبدأ يومنا الله يخليك
قطعت لأجل أوصلك ما لا أطيقه
جيت ولقيت بالردى تحتريني
خذلتني وإن كان تبغى الحقيقة
ياليتنا من حجنا سالميني
وأحلم بطفلٍ صغير ينام ف أحضاني
لا رحت أعوّد أنا مشتاق وأضمه
قطعة من البدر فيه الملح رباني
ويقول ميدي يبه ويقول لك يمه
أكيد أنا كنت السبب في غيابك
جاهل وأحسب إن الكرامة تحدي
لكن وعد لو ربي اليوم جابك
لأوقف معك ونكون أنا وإنك ضدي
فوق سفح أو تحت سقف أو بين ناسٍ أو خلف سور

إنت قلبي وين بس ألقاك وما عليك
يارب أنا عبدك على وعدك ما دامني أستطيع
ماضٍ علي حكمك وعدلٍ يا إلهي بي قضاءك
يا كم دعاك إنسان ضاق بعينه الكون الواسع
وبرحمتك في ظرف رمشة عين تعطي من دعاك
أسألك لي ولوالديني وأمة محمد جميع
عفوك فإن لم تعفو عن عبدك فمن يعفو سواك
بيني و بين النوم حرب وعداوه
اليوم ثالث يوم ما طب عيني
يا نوم تكفي مرجفني وخاوه
ياخي حرام اللي تسويه فيني
الفجر همس وعصافير وطمأنينه
ذكرني بصوتك العذب وسواليك
يا فجر عمري صباح الحب وسنينه
يارب دايم صباحاتك على كيفك
طفلٍ زرع من ضحكتك في خياله
لين أثمرت شعرٍ هزاله حراير
لا تتركينه في غيابك لحاله
بالله شوفي كيف هالطفل صاير
ووحده بوحدة كان عندك عداله

تبطلي غيبه وأبطل زقاير
يا رفيف الماء ، وفجر العيد ، وأحزان المواني
يا أكثر أهل الأرض طيبة قلب ، وأسرار دفينه
المكان اللي هنا مليان ضحكات ، وأغاني
والكلام اللي بغيت أقول يحتاج لسكينه
شوفي الركن البعيد هناك ، كنه صدر حاني
هذا هو اللي يليق ب شاعر وبنت حزينه
هذي اللي كنت أسمعه الجديد
من سنين الزهو وأيام البياض
قبل أعرف أهل الصحافة والقصيد
وقبل أعرف دروب خالين الوفاض
هذي هي الحب الأول والأكيد
ايه طبعاً ، فيه أجل غير الرياض
مثل ما أكره فكرة إنه واحد ياخذ مكاني
ما أقدر أجلس في مكان إنسان كنتي تعشقينه
الناس تشره على الدمعة إذا طاحت
وأنا أقول الفخر لا طاحت الدمعة
مهيب دمعة خضوع لحاجة راحت
دمعة خشوعك بعد تكبيرة الجمعة
من بغى الفرقا لقي له عذر وأسباب ودليل

خل عنك العذر والأسباب دام الحب ضاع
كان ودك بالفراق .. ابشر عسى عمرك طويل
لا تردد وانت لك كلمة ولك أمرٍ مطاع
كنت أشوف الناس مثلي كل ماجعت وظميت
مادريت إن الاوادم ناس فوق ناس وناس تحت
الناس واهلك والعصافير والشمس
الكل من بدري صحى في انتظارك
قولة صباح الخير من صوتك بهمس
ماكنها إلا قول : عيدك مبارك
يا أكثر الناس طيبة جيت في وقتك
شف كيف وجهي شحب لونه من أسبابك
هذي سواتي من أول يوم فارقتك
ألوم نفسي .. وأدور عذر لغيابك
أغليه وأخافه وأحبه وأداريه
وأخاف لا أفقد دهشتي في اكتشافه
وعلى كثر ما أبيه وأتعب وأنا أبيه
ما قد شكيت لغييمته من جفافه
الشعر والليل وبياض السحابه
والضحك والحظ الردي والمعاناه
كلش يذكرني بوقتٍ غدا به

ياوين برمي هالجسد فيه وأنساه
لا تطيع الهم لو همك كبير
قل لهمك لو كبر لي رب أكبر
بالصلاة يهون كل أمر عسير
يكفي انك تبتدي بالله أكبر
تعال واقطف بصوتك زهرة سنيني
كل المواعيد عقبك شمعتها طافي
تعال وازرع خصل شعرك بكفيني
يضمّها لين أحس بليك الظافي
تعال وش فيك خايف ! إنت ناسيني؟
قطعت صوتي عليك وطال ميّقافي
حتى بديت أشعر أن الحب معميني
وإن إنت حلم عثى فيني وأنا غافي
البتت هذي ضعت واحترت معها
تموت في شعري وأنا أموت فيها
لبي قساوتها ولبي دلعتها
والله يسامحها ويرضى عليها
أتخيلك وسط فستان ومعه طرحه
واقول يا حظ من هو جنبك ببشته
بيكون هو يومها ميت من الفرحة

وبموت مع حلمي اللي ما عشته
إن كنت ناوي تسافر لا تودعني
بس انتبه : لا تسافر قبل ما أشوفك
هذي دفا صوتٍ من البرد مخنوق
هذي سؤال نصف عمري جوابه
هذي هي اللي عرفتني على الشوق
هذي قدر.. ما كنت حاسب حساباه

يامن شكى البعد والغربه
غربتك في البعد عن ربك
الضييق والههم والكربة
وظروفك اللي تلاعب بك
واللي تحسه وتشعر به
يمكن عشان الله يحبك
جزاه سجدة على تربة
سواك من طينها وصبك

حزين !

حزين بس وتكتفي !

قل وجه غارق ف الحزن

قل عشر أصابع ترتعش

قل آدمي مثل السراب

صوته إذا مر .. مر بلا حروف

وتقول عن حالي حزين ؟!

حزين بس !

حزين بس .. وتكتفي ؟!

قل كان قطعة من فرح وأصبح حزين

حزين حيل ومنطفي

يا سقى الله قبل أسافر عنك يالدار الثمينة

يوم أنا طفل يشوف عيوب جدرانك مزايا

يوم أنا طفل يمر اليوم ما شاف الغيبينه

الضحى وسط المدارس والشفق بين المطايا

يا صاحبي لا تجي وتقول لي قالوا

لوقلت ما قلت غير الله يجازيهم

لاشفت بعض الأوادم للردى مالوا

نفضتهم من عيوني قبل أخليهم

أدري طواها التعب لكن سلامتها
يا عنك قلب المرض ما فيه حثيه
من كثر ما خانها في عز نومتها
لا قيل نامي تقول النوم مو لييه
ما أشوف بين أفعالك وكلمتك ربط
احتار قلبي معك واحترت أنا فيه
ما عاد يدري وش تبي منه بالضبط
وأنا ما عاد أدري وش اللي أسويه
يا مجتمع يفرض علينا سياجه
ما عاد فينا إنسان قادر على الحب
الدين حاجة والتقاليد حاجة
عذراً يا أرباب الوصاية : لنا رب
مرضاة ربي يا يمه ثم مرضاتك
هذي علومي فديت دعاك وعلومك
يا جعل ربي يحقق كل دعواتك
إلا دعائك : جعل يومي قبل يومك
شريت لك من باكر العمر كله
وكتبت باسمك خارطة ذكرياتي
أنا حياتي لغز واللغز حله
إنني أحبك ما بقى من حياتي

اي والله أذكر عيونك يوم أطلعها
اقرابها انشودة كنا نغنيها
كانت تروح وتهج البال وأتبعها
تاخذ عيوني من الحزن وتوديتها
لأيام كنت أرمي بدنياي وأجدعها
أيام ما كنت أكحلها ولا أعميها
صباحك ألطف من بحر جده
صباحك أجمل من سواحلها
فاقد صباح الخير من مده
إن كنت تبغى الخير لي.. قلها
ياللي تقول الدار داري وتختال
ما شفت جده كيف لا روح عصير
تبغى الصراحة كلمة الحق تنقال
جده بحرها غير وجروحها غير
في عيونك سالفه جروح وحزن
وارتباك ودمعة وحيره وآه
يكذبون أهل القوافي والوزن
دمعتك أعظم قصيده في الحياة
كل ما طابت هجوسي رحت أسولف للزوايا
عن فتاة كان يملا صوتها صمت المكان

عن فتاة غير كل اللي قرينا في الحكايا
صمتها طيش وقصيد وطيشها صمت وأمان
باقي فيها من اللي في طفولتها بقايا
شيطنة ضحك وسوالف .. رقة شعور وحنان
حاولت أذاكر بس وشلون أذاكر
أقرا ووجهك بالكتب ينرسم لي
يا قلبي المشتاق قص التذاكر
مشتاق أشوف عيونها تبتسم لي
أدعي لك الله مثل ما أدعي لنفسي
من حبه الله كل هالناس حبوه
تصبح على رحمة من الله وتمسي
أغلى هديه دعوة الأخ لأخوه
أتعبتني عيوني قد ما هي بصيرة
وأتعبتها يديني قد ما هي جفول
قلت خيره ولكن وينها ووين خيره
لا عيوني تكف ولا يديني تنول
كل ما عشت قلبي يا ضلوعي تقوي
ورحت أنا وياه نرقب رجعة اللي فاقدينه
نوب أقول : إليا رجع باكون في قمة هدوي
ونوب أقول : إلا ابزعل واتلى ما بيني وبينه

إنت ياللي وجهك أشبهه بالصباح
فال خير وطيبة وطهر وقبول
استعن بالله وابدش بالنجاح
كلها كم يوم والشدة تزول
المسألة ماهي على لبسنا حكر
يا كم غطا يكشف لنا عن خطايا
المسألة يا ديرتي مسألة فكر
نبقى بدون الفكر ناس عرايا
لا تشبه إلا نفسك
واياك تنكر أمسك
وأنا أوعدك في يوم

(الأرض تسمع همسك)

يا قلب طالت قسوتك وإنت ليين
في قسوتك يا قلب ويش إنت لاقى
اللي تعدي عمر ماهو ب هيين
والعالم الله كم من العمر باقي
يمكن يطول ويمكن اليوم أعين
موتي ، ويبكون الحبايب فراقى

وش عاد أسوي وسط قبري وأزيين
لا جفت عيون وعروق وسواقي
لا عاد به فرصة عشان أتحين
ولا عاد به زفرة وأفك اختناقي
باكر وكل اللي سترته بيين
وأنا على هالحال يائس وهاقي
مدري متى يهديني الله وأدين
وأكف عن بعض المشاوير ساقي
ماني بحاجة مواقف .. بس أنا بحاجة رفيق
الرفيق إن صار جنبك هون الضيقه عليك
وإنت ما قصرت ياللي كل مال الدنيا تضيق
أرمي الضيقه ورايه وأترك الدنيا وأجيك
ما كان موعد وأعدرك لو يفوتك
أنا انتظرت العمر كله عشانك

اللي تركني وأنا في عز غربالي
بعد الشدايد وش اللي ذكره فيني
يبغى زمانه يعود ويرجع الغالي
وشلون يرجع بعد ما طاح من عيني
لا الوقت وقته ولا له شي في بالي
أنا نسيته مثل ما كان ناسيني

صباح العذر لو طال الغياب وطالت ظروفي

صباح الطيبة اللي في عيونك كل ما جيتك

بقى يومين بإذن الله ويقفي همي وخوفي

وعسى الله ما يخليني بعدها ان كان خلتك

هذا مسافر بكره وذاك سافر

وهذا وليف ودعوه المواليف

لو كان في فصول السنة فصل كافر

عز الله إن الاسم لايق على الصيف

بستعير الليل لا منه هدا

ورعشه الورد لا بله ندى

ووحشة الصوت لا اجتاح المدى

ولهفة أصوات الحبايب للصدى

والكلام اللي نسيت

والكلام اللي جمعته واستحيت

والكلام اللي نسيت إني نسيت

وكل ما في الأرض هذي ما عدا

ما لا بليق بقلبك

عشان أقول: أحبك

يا رب ياللي مالنا غيره ولا ندعي سواه

علمتنا ما نعلم وتعلم بما لا نعلمه

إنت الغني عن من طغى وإنت المجيب لمن دعاه
نسألك يا كاشف متاهات النفوس المبهمة
تكشف عن أمراض البشر وتفك كل من عناه
وتكفيننا شر أهل الحسد وأهل الوجيه المظلمة
أدري تحملت مني فوق ما تقدر
وأدري تجملت في .. الله يجملي
ما هي كثيرة وقلبك بالوفا يذكر
إن ما تحملتني من بيتحملني
قطعة حزن في جيب بالي ومشقوق
ومضة فرح في عيون ناسٍ غلابه
إن سولفت في ثغرها لمعة بروق
وإن سرحت في عيونها صمت غابه
واليا ضحكت نور من الفجر المسروق
واليا بكت تحزن عليها الكآبه
الي يقول الصباح أعذب هوى يكذب
لو يزعل الصبح مني واجرح احساسه
أنا اعرف إنسان لا أطف ولا أعذب
وأشك بأن الصباح يقلد أنفاسه
كم تزاعلنا .. وكل ينتظر دمح الخطايا
ثم سكتنا .. والزعل من بيننا مثل الرهان

لين ما تنهي زعلنا ضحكة بين الشفايا
ضحكة غابت ولكن شأنها ما زال شان
رفيقي اللي يقبل إن صدوا الناس
إذا أقبلوا ما أقابله مثل غيره
هذا هو اللي رففته ترفع الراس
فخري وذخري في الأمور العسيرة
يوم شارف ليلى الموحش على ترك الحياة
كانت الدنيا ترد الروح للشمس البعيدة
والبحر كانت عيونه غارقة ف الذكريات
وكنت أنا جالس على حد الزمان أكتب قصيدة
اليوم صوت الريح ما بشر بخير
لا الناس ناس ولا المشاعر مشاعر
الشمس وغصون الشجر والعصافير
تبكي ووجه الأرض بالهم واعر
تطمنوا ما صار في الوضع تغيير
أظن بس البارحة مات شاعر
الكرم ما صار في هيل وذبايح
الكرم في البذل قدر الاستطاعة
يا عرب يا ناس يا كبر الفضايح
كم لكم أخوان قد ماتوا مجاعة ؟

علمها كم لي وأنا ما شلت جوالي
كله علشان ما أقلب رسايلها
يا بنت يا أم الضحكة أم المعاطيب
لا ماك ذنب وشاعرك ما بعد تاب
مرت ثلاث سنين يا أغلى الرعايب
والريح تشكي للشبابيك والباب
مرت ثلاث سنين بين المراقيب
عديتها يا بنت مراقاب مراقاب
جيت في ليلة وداعه تايه بين البيوت
وصحت: «وينك؟! جيت اوادع عمري الي ضاع فيك
ما سمعت إلا صدى صوته وكان أرق صوت
ينطق اسمي ثم يهمس «من متى وأنا احتريك?!»
الله يسلم يدين الجرح و الفرقى
ويسعد صباح الخطا والشك والغيره
يوم ابعدتني قبل لا اقاسم الورقا
لحن الرحيل ومذاق الحزن والحيره
مدري علام الرياض اليوم مرتبكه
كن القلق ينتثر فيها ويجمعها
ما كنا إلا عروس ليلة الشبكة
كل ما ذبحها الخجل عضت أصابعها

أو كنها طفلة لهروجها حبكة
تضحك لأبوها وأبوها ما يدلعها
من كثر ما كان طيفك دايم قبالي
أحيان أحسك معي وتضمك إيديني
ولا من تنبتهت لين وجيه عذالي
كل على ما طرى باله يسميني
دعوه من القلب هي أعزما أملك
من قلب صادق في ظهر الغيب يدعي لك
ما عاد تشفع ريحة الورد للورد
وما عاد تغري فرحة العيد بالعيد
العام مر ومرت أيامه الشرد
والشمع عيا ينحني للزغاريد !
لو يعرف الورد من جبته عشانه
كان قبل أشريه يسبقني عليك
ألف بسم الله على مترف زمانه
المرض مثله مثل غيره يبكيك
والمرض معذور لوني في مكانه
كان أخلي كل هالعالم وأجيك
طرد المقفي مثل طرد العذاريب
وأنا تعبت أبلع مشاريه الأعراب

أما تعالي واقطعي دابر الريب
وإلا انسي إني كنت أنا وإنتي أحباب
إن كان هذا زعل علمها يالغالي
ما كان قصدي ورب البيت أزعلها
علمها واللي يخلي قلبك الخالي
عن ضيقتي وين وصلت من تجاهلها
هيه .. وين أنت ياللي كان مافيه غيره
يفهم اللي أقوله قبل حتى لا أقول
رحت أدور حبيب مثلك أبغى أستشيره
وأثر ماكل زول ينتعوض ب زول
يا غايبه وإن كان فيها جماله
تجملي يا أم الحلا والظفاير
بالله شوفي صاحبك كيف حاله
شوفيه في غيبتك وشلون صاير
لاضقت رحت وتركت الناس واللمه
ليدينك اللي تحتها تزهر أنفاسي
يا تاج راسي يا عمري ليه مهتمه
الهم خليه ليا يا بعد راسي
يمه يا يمه يا يمه ايه يا يمه
من دون صوتك أحس إن الزمن قاسي

أنا لولاء قلت ان الزمن بموت ما انصفتني
وأنا لولا الزمن ما كنت اهو جس وإنك قدامي
هي الدنيا كذا لا جيت ارتب للكرى جفني
تكاثر غفوتي حتى تصير أبعد من احلامي
يا صغير السن قدرك طاحت أبراجه
الجرح خلى الصخر ينطق ونطقني
خلاص ما عاد تعني لي ولا حاجة
رح جعل ربي يوفقك ويوفقني
من بعد ما كنت نور العمر وسراجه
اليوم صرت الظلام اللي يطوقني
يا بعد طول المسافة والكلافه والشقا
يا بعد كل الحياة وكل ما جاب الخيال
ما وري سود الليالي والفراق إلا اللقا
وش تبين بهالدموع الزرق يا بنت الحلال
علمها وشلون لامرت على بالي
اروح وأضم صورتها وأقبلها
وعلمها كيف أنشغل عن كثرة أشغالي
وأسرع وأغمض عيوني وأتخيلها
عيبوني وأتركوني في عمايه
وأتركولي واحد يرضى عيوبي

اتركوا لي واحد يمسح شقايه
كل ما حط الزمن دوبه ودوبي
يالصيف يا فصل الجفا منك لله
كم قال عاشق: حسبي الله على الصيف
ذوقتنا طعم الفراق وكرهناه
وعلمتنا وشلون فرقا المواليف
تطيح دمة واسلم للفضا موقي
وارفع يدين الذنوب وتظلم اعماقي
اشوف قبري يمر يوحشته فوقي
وتصير كل الحياه أضيّق من أخلاقي
يا نفس طالت ليالي غيّنا فوقي
كم قلت يالله وقلتي تونا باقي
أسمعك ياللي تنادينني يا بو قلبٍ خلي
بس أنا ماني خلي القلب لجل اسكت واجبك
الخلي ماهو بقلبٍ من هيامك ممثلي
الخلي قلب آدمي شافك ولا هام فيك
ياوين ابرمي هالجسد فيه وارتاح
لا صار حتى البوح ما فيه راحه!
قالت إلا تصدق يا عمري تعال
من متى والحزن لأشعارك غذا

قلت مدري بس يا بنت الحلال
الهموم تسوي أكثر من كذا
يا فديت اللي إذا جيته أقول :
قل أحبك استحي ما قالها
وإن زعلت .. يتمتم بهمس خجول
تطلع أحسن لو تجي من حالها
أنا سعيد إنك بديتي تعرفين
إني أفكر فيك في كل حزة
لكن حزين إنك عجزتي تحسين
اللي أحسه حب وإلا معزة
وأفرض إنه فيه ناس يشبهونك
المهم إن أنت ما تشبه لأحد
يارب أنا اسلمت لك أمري وفوضته إليك
أغفر لعبدك ما تقدم من ذنوب وما بقى
لا منجأ إلا منك لك ولا أتكال إلا عليك
اسألك تبعدني عن دروب الدناءة والشقى
علمتني في صف (أول حبك) أن أكبر سفيه
اللي إذا حس بغلا خله يفرط في غلاه
طيب علامك كل مازدتك غلا تزداد تيه
آهات والله يا وطن حتى ولو ما قلت (آه)

اذكر إنك كنت لي مثل الهواية
لو تروح ولو تجي يبقى شحوبي
بس مدري كيف صرت اليوم غابة
وصرت أجي وأروح مدري عن دروبي
أنا عزيز النفس لا جيت للجد
واللي تمادى يلزم اليوم حده
صحيح صعبة ابني الحب واهد
لكن ترى لاضقت والله لا اهده
لو ما بيك
ما أتضايق من كلامك
لا ولا أزعل عليك
ولا ابتسمت بكل لهفة
كل ما فكرت فيك
بكيترك لحالي وأنا كنت معتاد
تكف دمعي ب أيد .. وتضمني ب أيد
ظنيت في ناس وتفاجئت في ناس
وحببت ناس وناس حبوا فراقي
قبل ألتقي فيكم وأنا شاعر بياس
وشاعر بكسرة خاطري واختناقي
شكراً يا أحبابي على صدق الاحساس

منكم .. لكم .. فيكم .. فضا الشعر باقي
الخطابة فن ساحر بس نادر من يجيده
لي متى في كل جمعة تسمع اللي كنت خابر
الكلام اللي سمعنا في طفولتنا نعيده
يا عرب ليت الخطب في ديارنا قد المنابر
جتني ومعها ورود وضاعت يديني
احترت مدري من اللي يهدي الثاني
صحيح غايب لك أسابيع وأيام
ولا أنت بولد خال ولا أنت بولد عم
لكنك أقرب من عيوني للأحلام
وتدري رفيقك شاعر وشاعر بهم
والشاعر إن كانك نويته بالإعدام
قل له متى أو وين أو كيف أو كم
ذكريات الليل والنسيان وقلوب الصبايا
والشقاوة والشقا والحب وعيون البنات
كنت اقلب في رفوف المكتبة بعض الهدايا
وفاح عطر العمر فجأه من رفوف الذكريات
جيت ناس تزود حيره القلب حيره
قلت أطيع الزمان وكل شده تزول
قالوا العمر يكبر قلت كذبه كبيره

عمر الإنسان يصغر كل ما هو يطول
أنت زعلان لجفائي وما دريت إن زعلي
يوم قلبك مايبيني قد ما قلبت بيبك
حتى لو عيت همومك في غيابي تنجلي
كل هذا مايساوي لهفتي يوم احتريك
يارب وإن العفو والعبد مهما أخطا
رجاه في رحمتك أكبر من ذنوبه
بعد المذله جيتني اليوم تنشد؟!
خلاص أنا فكيت حبل الموده
مادام به ناس عن الدين ترتد
وش يضمن إنه ما يجيني منك رده.؟

ف الذاكرة شي لو أنساه
يمكنني أعيش متهني
ف الذاكرة دمع لا والله
ف الذاكرة طفل يغني
ليت الأمانى جبل وارقاه
وانسى همومي وينسني
الهم هاللي تشوف إنه علي بادي
ياليتك تشوف كيف يصير في قربه
الله يحرم .. عيوني لذة رقادي

إني معه.. ما اعرف حزني ولا اشعر به

يا دفي من حروف الشعر

يا أرق من حلم السنين

إذا تركتك تنتظر

حسني إن إنت حزين

قل : ما بيك

وإذا رجعت أصفحك ابعديك

أنا أنجرح قبل أجرحك

وابكي عليك

لكن ابي مرة تحس

وشلون أنا أموت فيك

إن قتلني الحب وإلا ما جرحني
قلتها من قبل يقتلني السكوت
لو يزيد شوي في قلبي ذبحني
ولو يقل شوي من قلبك بموت
أشعر إن الحب في صفه ربحني
قبل أحبك كان مالحب صوت
يارب حنا عبادك وأهلنا عبادك
وجدودنا قبلنا ماتوا على عهدك
ميعادك الحق أمنا بميعادك
يا أكرم الأكرمين اجمعنا في خلدك
جف الكلام ومدت يديها فوق
اخترت هذي .. وإنت شف لك سحابه
قلت .. ويديني تحتضنها مثل طوق
أخترت هذي .. هذي أكثر رحابه
أدري إنه كل درب وله نهايه
بس أنا باقي معك لأخر دروبي
فقدتك يا حبيبي في غيابك
أبيك تعود قبل أفقد صوابي
دام السواحل خطاوي رحلة الغرقا
لا ابغى السواحل ولا ابغى للبحر سيره

لا والله ابغى ملاذ عنك بالطرقا
لو كان حزنك ربيع وديرتك ديره
مدري من اللي يحب أكثر من الثاني
أحيان أحسه أنا وأحيان أقول أنتي
رغم الجفا ما بيني وبين الرياض
ما عمري اشتقت لمدينه كثرها
الخط يمسك ويرجع يفصل ويمسك
وأنا أستغل الثواني وأتصل وأرسل
ودي قبل لا يصوم الصائم ويمسك
أقول مبروك يا أغلى اسم في المرسل
يارب أنا أسألك الرضا وأسألك يارب القبول
أقبل صيام اللي قبل يفطر يناظر للسما
يرفع لك يدينه ويرجى عفو رحمتك ويقول
يارب لا تجعل نصيبي بس في جوع وظما
عطشان للماء ولكن العطش أكثر
للمغفرة والعفو والفوز بالجنة
يقول : (كيف الحال بعد المراسيل ؟)
وأقول (مثل الحال قبل الرسايل)
عمر الكتابه ما تجيب المواصيل
ريح مكاتيبك ترى الشك زايل

كل ما قال السهر درب الغوايه
قلت: كله من عيونك هبلوا بي
وكل ما قال الخطا ما هو خطايه
قلت له: قل للعيون السود توبي
يا بعد كل القصيد ونزوة حداه وأنيه
لاذكرتك لاح بيت .. وطاح ورد .. وفاح طيب
أذكر إني رحت قبل ابدي لك أيّة اعتذار
رحت حتى قبل أطيب خاطر في كلمتين
لكن أنتي عارفتني زين واللي صار صار
سامحيني وأذكريني قد ما انتي تقدرين
يارب أنا العبد الضعيف الممتلي طيش وذنوب
فيني من الدنيا تناقضها كذا لاجيت أقيس
أحيان رغبات الحياة تحوفني من كل صوب
وأحيان أكف الدمع طول الليل من صوت السديس
أخطي وأشوفك تبتسم كل ما أخطيت
وتدمح خطايه كن منتب تشوفه
طيبك من الله ما تبي مدح أو صيت
حيرت فيك الطيب يا دم جوفه
السعودي ما تهزه أي ريح
فايزين وما يصح إلا الصحيح

خصمنا له قدر لكن معليش
خبروه إذا لعبنا بستريح

أشعر إني قبل احبك

فوق هذي الأرض

قد عشقنا وافترقنا

في مكان .. خارج حدود الزمان

لين نادتني الحياة وقلت لك:

بكره بسافر

وأذكر إنك قلتي عني وقتها قاسي وجافي

وقلت وكفوفي تبلل من دموعك

لا تخافي

انا مدري وين رايح

بس أحس إني بشوفك

من بعد ما كان هذا القلب مربع اخويا
ضاقت الدنيا عليه وما بقى منهم خوي
خزنت أنا رقمك باسم (قلبك)
وان كنت تسأل ليه أسميك ؟
عشان لا من شوقك أقبل بك
يطلع لي : (قلبك يتصل فيك)
ياليت للضيقة زرار وأفكه
وأزر فوق الصدر ثوب السكينة
ودي بدمعي ينسكب وسط مكه
ولا أمسحه إلا وأنا في المدينة
تكافلوا تصدقوا طيعوا الرب
ياما فقارى مالهم صوت مسموع
أنسوا سوائف ناس ماتوا من الحب
وتذكروا أطفال ماتوا من الجوع
مع السلامة وأذكريني ولو طيف
وأنا أوعدك ما انسى عيونك والأهداب

والحين أنا أستأذنك يا أغلى المواليف
اليوم هذا (يوم توديع الأحباب)
قولوا له أني بنسحب منه كلي
خلوه يدري (من تغلى يخلى)
انسوا الهموم وودعوا ضيقة الصدر
عشر الليال المقبله كلها خير
لو وافقت دعواتكم ليلة القدر
ما أظن باقي شي تبغونه يصير
يارب تغفر لي وترحمني وترزقني اليقين
وتقبل دعاي لوالديني بالعفو ياذا الجلال
وتلطف بمرض المسلمين الصابرين الشاكرين
وتعف محتاج يعف يديه من ذل السؤال
مع كل نسمة صباح أقوم وايديه
ترفع بعضها كذا .. وأقول وانا دي
الله يسعد صباحك ياالسعوديه
عساه والله صباح الخير يا بلادي
كيف نتفارق وإن تضحك شفاياك
وأنا عيوني من رحيلك تغارق
حاول تذكرني وابعاول انساك
وإذا التقينا في الشعور نتفارق

كل البشر ما فيهم إنسان كامل
الكل منا عنده أخطاء وذنوب
وأكبر خطأ في الناس: سوء التعامل
وأكبر ذنوب الناس: تذب ولا تتوب
تطيح دمه واسلم للفضا موقى
وارفع يدين الذنوب وتظلم أعماقى
أشوف قبرى يمر بوحشته فوقى
وتصير كل الحياه أضيق من أخلاقى
يا نفس طالت لىالى غينا فوقى
كم قلت ي الله وقلتى تونا باقى
قريتى ما نيب أول من رجع لك وسط عينه
دمعتين كنها لبيوتك وناسك مرايا
القرايا سالفه أهل القرايا فى المدينة
والمدينة سالفه أهل المدينة فى القرايا
ياحبيب الكبر ما خلق لجل العباد
خلق للى ينادى : (يالعباد اعبدى)
يا حلاو العيد بكره يوم عيد
الوعد بكره وموعدنا هنا
ابغى لا من قلت لك : عيدك سعيد
تبتسم وتقول لى: عيدك أنا

تذكرني مره في أول أيام شوال
وأنا اذكرك في اليوم مليون مرة
اليوم عيد .. وليلة البارح سهاد
ما عدت ذاك الطفل.. أبو ضحك ومزوح
ايه تستاهل هي اللي طاوحت من لامها
وباعت اللي كل ذنبه ما دخل في سومها
خلها تدفع ثمن غلطاتها مادامها
هملت قلبي وراحت .. وأسرفت في حومها

عودت قلبي على صوتك وضحكاتك
أسهر عليها أليين النوم يدركني
مافيه احد في البشر سواي سواتك
اسمك إذا مر بين الناس يربكني
أوله على صوتك ورقمك ودقاتك
وأغار من ناس في صوتك تشاركني
ويذبني الخوف لامن طول سكاتك
أخاف ناوي يجي لك يوم تتركني
ناوي بعد ما غبت ترجع ياالحبيب
أو إنت جربت الغياب وراق لك
على العموم تغيب وإلا ماتغيب
ما فيه أحد كثري ترى بيشتاق لك

والله إن اقص كفي قبل أدق أرقامها
والله إن شيل قلبي قبل اشيل همومها
تعال شف غيبتك كيف أثرت فيني
تعال شفني وأنا أغرق عقب مجدافي
نجتمع من كل صوب
يوم يجمعنا عليه
خشية الله في القلوب
والسماحة في الوجيه
والندم عند الذنوب

وفطرة القلب النزيه

تعال خذني ورحبي من عناويني
تعبت اعدي على جمرك وأنا حافي
من قسوتك خليتني كل ما اشتقت
اغمض عيوني على شان اشوفك
قم وابتسم ياللي متى ما تبسمت
تصنع على وحه الصباح ابتسامه
راحت وأنا واطلالها اليوم باقين
ترقب عيوني بابهم والهبايب

إذا انفتح كل الخفايا بي تبين
وإذا تسكر جاوب الدمع غايب
قل شاعرك يعتذر ويعاهدك تالي
إنه يرتب حساباته من أولها
ويقول : حتى القصيد اللي على بالي
والله ما عاد اكتبه كانه يزعلها
لا صرت ربعي وداري فيّة جفونك
وش دخل الناس خل الناس يجفوني
يكفيني إن أنت لامن قلت وشلونك
تطيب كل الجروح ويختلف لوني
يالله تغفر خطاي وترحم وتوقي
عظمي نهار الحساب وتقبل أعتاقي
من بغى الفرقا لقي له عذر وأسباب ودليل
خل عنك العذر والأسباب دام الحب ضاع
كان ودك بالفراق ابشر عسى عمرك طويل
لا تردد وإنت لك كلمة ولك أمر مطاع
يا حبيب سباني واشهد إنه سبا
من زماني زمان ينحسب له حساب
شانك اللي ترعرع في الخفوق وربا
ما تغير مكانه رِغم طول الغياب

صاحب جميل .. وقلبك أجمل .. والأجمل
ضحكتك يا بو ضحكة تشبه العيد
ما اقول كامل.. بس قربت تكمل
ما ناقصك غير احترام المواعيد
الكون في غيبتك فاقد له إنسان
وأنا في غيابك فاقد الكون كله
يارب وفق من قرأ هالرسالة
وأغفر له وحرّم جبينه عن النار
دعوة أخو من لأخوة ودعاه
الله يجيرك من صواذيف الأقدار
اشتقت أوقف هنا وأعدّد أحبابي
وأقول للي أحبه إني (أحبه)
ماورى سود الليالي والفراق إلا اللقا
وش تبين بهالدموع الزرق يا بنت الحلال؟
اتركي عنك الدموع وخلي الحزن يهقى
إن ماله فالقلوب الطيبة أية مجال
ما كن قلبي واحد من بيوتك
من تحت سقفه كم شعرت بأمانك؟
وراك خليته لعتمة سكوتك ؟
وأنا ما غير أعشمه في حنانك

أيه أنا يالساحل الشرقي لفيتك عاني
ليلة ما كان فيها ذرة الحنية
مثل ما قد قال رابح في حد الأغاني
الهوى شرقي وقلبي هاوي الشرقية
تعال شف صاحبك قافل على روحه
بيبان الأيام والدنيا مسكرها
ينسى له عيون بنت طارت بروحه
والمشكلة لا تناسها تذكرها
انتبه تطوي شراعك قبل توصل للأمان
لا خذلك الوقت قل له الأمل بالله كبير
ابتسم رغم الظروف ورغم عن أنف الزمان
ما خلق ربي عسير إلا خلق بعده يسير
أكذب عليك إن قلت أنا اليوم ما أبيعك
لكن ما أظن الحظ يقدر يجيبك
حظي وأعرفه زين ماودي أشقيك
روحي عسى درب السعادة نصيبك
الشمس في الشباك تبغى تصحيك
والنوم ما وده يفارق عيونك
قم واسمع بقلبك حديث الشبابيك
وش لون كان الصبح بارد بدونك

الجو نعمة والمطر ماله اشباه
لا طاح يبهج عالم ويغسل نفوس
ارفع يدينك للسما وأشكر الله
اليوم هذا أفراح وأعياد وعروس
غبت ورضيت وبعدها غاب صوتك
وابطيت أكذب .. من يقولون خانك
بالله كيف تحس في طعم قوتك
لامن ذكرت إنسان خنته وصانك
جيت مثل الغريب,,وكنت مثل البلاد
وقمت أباهي وأصوت يا بلدي يا بلدي
أحسب إني كسبت الكسب يوم الجهاد
وجبت راس العنيد وثلت حمل ابعدى
كل ما تطري علي فكرة هواك الأولاني
أشعر إني انطعن مليون مره من يدينه !
أشعر إن عيونك الله ما خالقها إلا عشاني
كيف كانت تبتسم له.؟! قولي إنك تخدعيه
القلب يظما مثل الإنسان ويجوع
لوجيه ناس تغيب وتمر باله
مادام قلبي يذكرك طول الأسبوع
أبستغل اليوم وأرسل رساله

وين ابنسى وإنت طيفك صاحبي مدري عدوي
ما رضى يترك لغيره شبر واحد في المدينة
يا بو عيون تبصر وقلب أعمى
وش بدلك من الوفا للندالة
أول تسولف لي عن العدل والماء
ومن يوم ذقت الماء نسيت العدالة
ياليل يابيت السهر والحيارى
عرفتني وإلا كبرت وتغيرت
ذكرت أو كثروا عليك السهارى
اذا عليك إن قلت لي ما تذكرت
بشويش غط الحلم وأفتح جفونك
حتى نعرف شلون .. نصبح على خير
وش هو الصباح إلا أغاني عيونك
من نظم أهدابك ولحن العصافير
أكتب واسلّي خاطري بالكتابه
لجل ألتهى في نظم الأبيات وأنساه
وأثر القصايد منه قامت تشابه
من وين أقلب دفتر أوجاعي القاه
هذي قصيدة قلتها في عتابه
وهذي قصيدة قلتها يوم فرقاه

مدري وش أقول لكن تدري أسمعني
خابرك وافي وأبيك تتم معروفك
إن كنت ناوي تسافر لا تودعني
بس أنتبه .. لا تسافر قبل ماشوفك
لو خذاك الحزن لدروب العتيم
لا تمل الصبر وتخاف الظروف
أبتسم مادام لك رب كريم
واحتسب مادام لك رب يشوف
كل ما اسمع أغنية مليون خاطر
أذكرك وأقول مع عبد المجيد
أنت قول أبغى وأنا بقول حاضر
يا بعد كل الأغاني والقصيد
عشاق ووين المستريح
أسرار ودروب وخطى
الحب فاهمنا صحيح
والناس تفهمنا خطأ
الشمس غابت وجات اليوم ملهوفة
اصحى وشفها على الشباك تنتظرك
تبغى تشوفك .. ألا يا حي هالشوفة
وتصبح على الضحكة اللي زينت ثغرك

يا بعد عمر الكتابه والقرايه
يالشمالي يا ابو الملح الجنوبي
لاقرت اللي كتبتة يا رجايه
رح وبلغ ربعي اللي جنوبي
يا عين هلي دموع الوجد وانهمري
محتاج لي دمعتين تعيد ترتيبي
نويت دمر الزمان اللي نوى دمري
بايعك يا طبيتي شاريك يا طبيي
الناس كل على دربه ومنهاجه
وأنا عن الناس مابه شي يفرقني
إلا إني دايم أحب الصدق وأواجه
مخلوق .. والله على هالوضع خالقني
على كثر ماشال من وجهي الهم
عجز يشيل الحب والإبتسامه